

A. BALÎ
20.04.2010

ÇEND GOTINÊN RÊZANÎ YÊN REXNEYÎ JI BO SEROKAN!..

Dîroka cîhanê bi xopan û trajediyan hatiye dagirtin û ya Kurd û Kurdistanê jî, ji wan xopan û trajediyan zêdetirîn nesîbê xwe girtiye. Gelek karesatên (felaket) herî mezin li ser welatê Kurdistanê hatine û şerên dijwar yên di navbeyna Ereb, Ecem, Moxol û Tirkan de derbas bûyîn, ji wana gelek li ser erda Kurdistanê qewimîn e!.. Her car xwîn herîkiye, wekî lehî çûye!..

Di sedsala dawî de jî, seranserê Kurdistanê bûye gola xwînê. Li Başurê welat, di dema Saddam de, welat bûyî bû zindan û bi sedan komkujiyên mezin ji aliyê faşîstên hov ve pêk hatin. Bi dehan goristanên komkujiyan îro têne dîtin. Rêvaberîya Kurdistanê ya îro bila van bûyerên bûyî qet tu caran bîrneke! Li gora wê jî, yekîtiyek netewî ji aliyê hemî hêzên Kurdistanê Başur ve pêwîste ku pêk be. Mercên Kurdên Başur qet rê nade ku xapandinek din ji aliyê neyaran de, an jî dijayetiye li dijî hev û du di navbeyê hêzên Kurdistanê de, di ser Kurdistanê re carek din derbas bibe!..

Lê li Bakur, li Rojhilat û li Başurê Piçûk ewrên reş îro jî di ser gelê Kurd re diçin û tên! Li ser her bostek erda welatê roj nîn e, ku bi kemînek neyaran xwîna Kurdistanê nerêje! Îro çiya, deşt û zozanên Kurdistanê di nav mij û dûmanê de ne...

Di dîrokê de Kurd pir hatine xapandin. Îro jî Kurd dîsa têne xapandin! Ji xapandinên pêk hatî de jî, Kurdistanê hindik ders girtine!.. Bindestiya Kurdistanê ya heya roja îro berdewam kirî, belku ji van bê dersiyên (bê tecrûbe, tecrûbe negirtî) têye. Di dîrokê de, pir caran neyaran bi şer(r)an zora Kurdistanê nebûne. Neyarên Kurdistanê, Kurd bi xapandinê, di nav hev de, bi dabeş kirinê û her beş jî, bi hev û du re dayîn qirkirinê, bûyîne pispor!..

Di sedsala dawî de, li paş komkujiyên mezin (ya herî dawî qirkirina Dêrsimê) li Bakurê welatê bê dengiyek dirêj heya destpêka salên 1970 yê berdewam kir. Kesen qasî salên min yên ku salên wan ber bi hefteyê diçin şahidê van bûyeran hemiyan in. Di nav vê têkoşînê berdewam kirî de, hemî walatparêzan li gorî karên kirî jî bedel dayîne... Lê çî heyf e! Serketin û mafên demokratîk bi destxistinê de negihîştine armanca xwe...

Gelê Kurd, merd û comerd e. Ya rast ew e, ku dem ne ew dema xwe pesinandinê ye! Ji ber ku hîn Kurdistanê di aliyê xwe yê demokratîk de mafên xwe negirtine û hîn tiştek bi dest xwe nexistiye. Ji bo vê sedemê jî, yên di salên min de, karê me dayî ser milê xwe çî mixabin me nikarî, em bibin serî! Yên îro xwe dipesinin, ewna li ser milê mêrxwasan bilind bûne! Di tevgerên azadîxwaz de, ew lehengên bênav, ew in ku qehremanên rasteqîn in û qedera şeran ew tayîn dikin! Îro ew hemî nîrxên hêja di nav tevgeran de hatine binpêkirin!..

Qurnên Kurdistanê kevn ji yên îro dijî re jiyaneke aza û bextewar amade nekirine û nehîştine! Berpirsiyariya bindestiya Kurdistanê tê de dijîn, ew li ser erka wan maye. Çawa ew qurnên Kurdistanê kevn ji bo Kurdên îro berpirsiyar in, yên îro dijîn jî, ji bo duweroj, ji newiyên xwe re berpirsiyar in. Kurdistanê çiqas karên qenc kirî bin jî, ji bo ku Kurdistanê encam negirtiye û karên bûyîn jî, îro Kurd baş lê nebin xwedî, ew jî yê bê guman têk biçin! Ji ber ku jiyaneke aza û serbixwe, ji bo newiyên xwe me amade nekiriye!.. Em ji bo azadiya Kurdistanê çawa qurnên berê tewanbar dikin, qurnên nû yên bîn jî, ewê Kurdên îro dijîn tewanbar bikin... Ji bo ku tiştekî berbiçav me ji wan re mîras nehîştîye!..

Mafên qurnên nû zêdetir heye, ku me tewanbar bikin. Ji bo ku karê me dayî ser milên xwe, me ew pêk neanî. Hêzên Kurd yên heyî, ji wan gelek li dijî hev bûn! Yekîtiyek fireh ji bo azadbûna welatê pêk ne hat. Her serok ji bo ciyê xwe garantî bike, ew li dijî serokên Kurd yên dîn radiwest. Ji xeynê wê, her serokê Kurd ji bo ciyê wî tijî bibe, ji xwe re cihgirtek jî amade nekir. Di nav partî û saziyan de, her kesek hinek pêşda çû, ew girtin dane du! Hinekan jî, dixwest ew kesên hêja jê qetî serê wan jê bike!..

Di destpêkê de ew mirovên weku me, bi çaplûskiyên ne di ciyê xwe de, endam û hogiran, ewna ji rêya rast kirin der. Ji xwe re hin serokên nû çêkirin, weku putan. Serokan jî, roj bi roj xwe wusa wek put dîtî. Yê li dijî wan derdiketin, ew hemî dihatin avêtin. Yê di nav sazî û partiyê de diman jî, ji wan re dibûn putperest. Yê ji xwe re put çêkirin, Kurd bi xwe bûn! Putan jî, nehîştin ku di nav tevgeran de kesên duwemîn û sêyemîn çêbibin! Her çiqas put îro bêjin jî, ji me rastir û baştir kesek tune bû! Ew gotin ne di ciyê xwe de ye...

Îro bi hezaran qadroyên hêja û jêhatî di mala xwe de mayîne. Hevkarî û yeketiyek rasteqîn di nav Kurdên Bakur de, îro jî çênebûye. Ewqas sal e, ku serokên Kurd li dijî hev in. Ya rast ew e, ku ji bo çî li dijî hev in, gelek mirovan heya roja îro jî, hîn ew sedem baş fehîm nekiriye! Sosyalîzma mala Kurdan bi freksiyonan xirab kirî, di dema borî de, ji bo Saddamê xwînêj û bi serokatiya Sovyetê, li dijî têkoşîna Kurdên Başur ya bi serokatiya lehengê nemir Mela Mustafa Barzanî hemî alîkar bûn!.. Ew kêmasiya me ya hemî şoreşgeran qet tu caran naye bîrkirin! Şoreger ew in, ku dema şaşetî kirin, li xwe jî rexne bikin. Lê rexneya serokên Kurd ya li xwe bikin ne mimkun e. Ji ber ku ewna putên pîroz in û xwe wusa dibînin. Dema ew li xwe rexne bigirin, ewê weku xwelî bipişivin û biçin!.. Şairekî mezin bê wate ne gotiye:“ Benî adem ji xwe re putan çêdikin û paşê jî vedigerin, ew putê xwe çêkirî lê perestî dikin!”

Ji tevgerê serneketî re, bes tenê serok berpirsiyar dîtî jî bê însafî ye. Ji ber ku yê tevgerê belavkirî û bê tesîr hîştin, bes put bi serê xwe tenê nîn in. Ji ber ku qadroyên jêhatî û kar dikirin, wana ew merc û ew mertebeyên bê kontrol dayî bûn serokan. Ew selteneta serokên welatên sosyalist ya bîst salan berê xilî, hîn serokên Kurdan yê di wê dewsê de diçin û li ser ew îdeolojiyên kevn yê puç û belav bûyî, ew hîn neyartiya hev û du dikin...

Îro rêyek rast li Bakurê welat nîşan dayî, anca ew bi yekîtiyek rast yê pêk be. Serokên Kurdan yê îro kar di dest wan de, ya ew bê kêr in, an jî zimanê mirov naxwaz bêje gotinek dîn!.. Dema mirov li halê hemî serokan bînerî û rewşa Kurdan ya îro tede berhev bîne, ma li ciyê xwe rawestî û ji yekîtiya Kurdan revîn, gelo ma ew ji kê derê têye? Sûda wê ji Kurdan re çî ye? Ji ew berpirsariya dîrokî re, serokên Kurd yê îro dijî û rê li pêşiya yekîtiya Kurdan digirin, ma ewên ji newiyên xwe re çî bersivê bihêlin?!

Gelo ma carek dîn, Kurd bi destên serdestan ve dîl hatine girtin ku, hîn em pê nehesîne? An jî bi pîrsek rexneyî, ma ji bo çî serok di şaşetiyên xwe de îsrar dikine?..

Roj, roja eniyek netewî li Bakurê welat avakirine! Mercên îro heyî heke rabirin, biçin, duweroj yeketiyên çêbibin nikarin serkevin! Bê yekîti, dengê Kurdan îro baş naye der. Dengên derdikevin jî, bi navê terorîzmê tînan nasîn. Ji ber ku dengên cuda cuda baş nayên bîhîstin. Bi yek dengî heke Kurd biqîrin, bê guman guhên ker(r) jî yê bibîzin! Ji bo ku Kurd îro ne yek in, ji ber vê sedemê jî, Kurd bê deng in! Li cîhanê ma ji dîl û dîlîtiya Kurdan ya bêdeng xirabtir hîn çî heye?..